

# **MAAMUUSKA MASIIXA**

**WAA MADIIX LOO TIRIYAY  
SAYID CIISE MASIIX**

Hawlaha Masiixiyada Soomaalida  
Somali Christian Mission

MAAMUUSKA MASIIXA

Daabacaadda koowaad, Sebtembar 2005

Daabacaadda labaad, Sebtembar 2012

Published by:  
Lutheran Heritage Foundation  
Nairobi, Kenya

## KOHASHO

Waxaan kitaabkan kooba ee madiixa ah la kohday Wali Maxamed Shiikhdoon, wali Aadan Jimcaali iyo Wali Cabdiqaadir Mursal -Eebbe ha ka raalli noqdee- oo jacaylka Rabbigu ka buuxay qalbiyadooda, in badanna u adeegay boqortooyada Eebbe.

Hal abuurka

Rabbiga gabay cusub ugu gabyoo  
Giddigaa dunidaay, Rabbiga u gabya  
Rabbiga u gabya oo magaciisa ammaana  
Oo ku dhawaaqa badbaadadiisa maalin ka maalin  
oo ka sheega ammaantiisa quruumaha dhexdooda  
oo shuulkiisa yaabka leh dadka oo dhan ka dhex sheega  
Sabuurka 96:1-3

## 1. WAQAY WAA DEEQSI

Waa masaafu uu tiriyay M.G. maalintii mawliidka Ciise  
Masiix ee sanadka 2002

Dannigii Xaawiyo Aadan baa  
Dadkii iyo Eebbe kala diloo  
Shaydaan baa duufsaday naflihi

Waqay waa deeqsi jecel  
Inuu daajiyo nimcadiisa darar  
Intii dooyadiisa noqota iyo  
Intaan daba galin ibliis

Waa duul sharka dooniyoo  
Ku bixi duf iyo belaayo oo  
Dariiqii Eebbe diide oo  
Sanam iyo dhax doorte oo  
Wixii dadka bi'inayiyo  
Xumaan loo wada dareer

Docdiisaa la magan sadaaye  
Cadhaa daartoo Eebbe dhirif  
Koluu dunida maansheeyo iyo  
Dabkii Soddom iyo Gomora iyo  
Ciqaab aan soo daahinoo  
Degdeg wax gumaadi soo  
Kuwii daba maray waqood  
Abaal uma helin dabeed

Dacdaro iyo silica daran  
Ma doono Eebbe diif  
Naxariisaan loo aaba dayin  
Iyo isagaa leh deeqi badan

Ibraahin kuu doortay buu  
Firkiisii ka door bidoo  
Heshiis buu inaga dalboo  
Faracii Daa'uud dhaliyo  
Cadradii Yuusuf u doonanayd  
Ruuxiisaa ku soo degoo  
Jibriil baa u diiqay eray  
Bishaaradii Eebbe daaranaa  
Diric ay umuli doonto oo  
Uur bay dig tidhi dabeed  
Yuusufna waa loo digoo  
Inuu daryeelaa la faray

Degmo san Baytulaxam  
Habeenku goortuu dumaye  
Dunidu wada seexataa  
Dugaal iyo daar ma haysanine  
Mooro dad kale leeyihiin  
Maryama ay docatay fool  
Masiixuna ku dhashay darteen

Samadii baa noo dillaacday oo  
Xumihii waa la duugay oo  
Dambigii waa dhamaaday oo  
Sharkii baa dabar go'oo  
Badbaadaa noo soo degtoo  
Eebbaa docdeenna haatan yimid  
Oo heshiis aan dumaynin baa  
Qalinka lagu wada duugtayo  
Dambigii jacayl baa baddalay  
Mashxarad aan abid damayn  
Farxad hees durbaanka tuma

Maqaawiir cirka daawadaa  
Xiddigaha intay daalaceen  
Dubad inuu yahay garteen  
Waxay dadka sii toydaan  
Dagalkuu joogay tageen  
Dar bay caabudeen rabbiga  
Deeq malmal iyo luubaan  
Shay dahabay wadeen  
Markay dib u laabmayeen  
Digniin soo maysan helin  
Dariiq kale inay maraan

Herodh kii soo diraye  
Boqorkaan dooni yidhi  
Cadho soo ma uu dibirin  
Markuu iyagii waayay door  
Ciidan soo muu dirino  
Dalandalkii doraato iyo  
Da'da ka yar lab sanaba  
Dhammaan waa in la dilo  
Xaajadii kuma ay dambayn

Dulkaa iyo Masaari taga  
U qaxa dagal nabada iyo  
Meelaan sii diyaarshayoo  
Duulaanka aad kaga baxdaan  
Waqay soo umuu digino  
Halkaa dool umaysan tegin  
Kumay doogsanaynin dhaax  
Illaa mawdku dilay Herodh  
Dalkii Israa'iilna nabad  
Ubadka lagu daadahsaday  
Malag soo dejiyay fariin  
Reerkoo la dabaalo iyo

Inay Naasireet degaan

Yaraan wuxuu daalaa dhacaba  
Durba wuu tabar galoo  
Emmaanu'eel tii Eebbe doon  
Dalkii uu joogi jiray iyo  
Dushii Naasireet ka durug  
Dulkaa iyo Galiile aad  
Wabi Urdun dooxadiisii gaadh  
Durdurkii mukhuur daf yidhi  
Dadkii halkaa joogay iyo  
Eraygu daaftoo dhan gaadh  
Wax duulku la yaabo iyo  
Murti laga wada durduur  
Laysku wada daaray oo  
Hadalkii meel dheer dawaaf  
Nafluhu jacaylkiisii darar  
Dul aan dhawayn iyo gucluhu  
Illaa Dimishiq ka yimid

Kuwii aan waxba daalacane  
Indhaha nuurkii ka damay  
Durba waa loo furoo  
Farxad bay daawani cariga

Kuwii aan dalan doolinee  
Laxaadkii dar u beelay iyo  
Curyaankii dawarsani jiriyo  
Dhulkay dalan baabiyaan  
Oo durdurada bootin dhistaan

Kuwii jinnigu dardaray  
Ee waalida diblaha u xidhnaa  
Masiixaa dabiib u noqdayoo



Bushigii waa laga dulqaadayoo  
Rabbay daacad u caabudaan

Kuwii qabriga la dul dhigee  
Dadkoodii uu ka quustayee  
U dawaafay aakhiro xaggeed  
Geeridii waa laga daafacoo  
Ruuxoodii la soo dabbaalyayoo  
Xayi baa durba laga dhigoo  
Eebay dar u caabudaan

Daab iyo cudur kuwuu  
Jidhkoodu uu silic danqaday  
Sayidkaa ka daaweeyay oo  
Fayo iyaga oo daahiray  
Daanshaha farxad dakaynayaan

Kuwii daban jiray mallaay  
Shabagga kolkay daadiyeen  
Dalaq wax u yidhaahda iyo  
Hadday daaleen wax li'i  
Rabbigu soo uma doojinoo  
Xadhkihi markii ay dareen  
Dubaaqoodu wax uusan filan  
Iyo dooni buuxda ma hanan

Kumaan kum kuwii soo didee  
Isga xigmad ka doonayee  
U dib jiray dhaax aawadii  
Kolkii daranyadii haysay iyo  
Diiftiyo uu arkay gaajadii  
Maxaa docdiina yaalla oo  
Dadka laga dhex heli karaa  
Su'aal iyagii soo ma dirin

Shan muufoo la soo dubiyo  
Laba kalluun la soo dabaya  
Soo looma keenin durbaba  
Duco soo ma uusan ku darin  
Dool wixii halkaa joogay iyo  
Durduur shan kuni ma dharag  
Dibiradaa wixii ka hadhay  
Toban iyo laba dambiil  
Xertii dib soo uma gurin

Duufaan xumi goortay kacdee  
Doontii khatar ay gashee  
Xawaaridii baqo wada dideen  
Gargaar kiisa ay dalbeen  
Dabayshii soo dhacaysay iyo  
Baddii soo ma uu dajino  
Amarkiisa kuma uusan damin

Wax aan dareenkeenu garan  
Fajac aan dulkaan oolli jirin  
Masiixii noo soo degee  
Noo daabaana qaaday baa  
Dartii samuhu noogu duxay  
Xigmat aan deelqaaf lahayn  
Hadal aan durqumo ku jirin  
Murti dux iyo nuxurba leh  
Oon qarniyo laga daalahayn  
Iyo waxaan dhaxallay dahab

Kuma durduursiin karee  
Wax yar baan kuu dul mari  
Eebbe deeqduu na siiyay iyo  
In yar oo dulucdii ah baan  
Ujeedada ka dambaysa iyo

Nuxurkeeda u daadagiye

Rabbaa duco la magansadaa  
Masiix wixii laga doono iyo  
Deeqi waxaa leh isaga  
Dambigoo laynaga cafiyay  
Badbaado aan dabar lahayn  
Nimcada aan durduuranno iyo  
Daa'imkaa samo laga helaa

Kuwaa xaqa door bidee  
Ruuxiisu dugaalka u yahay  
Khayr baa ku soo degoo  
Dacdaro waa laga dhawrayoo  
Sharkana ka durkaa la yidhi

Jacayl ka Eebbe dugul  
Deriska caashaq ku dara  
Beentu waa shay darane  
Dibnaha ka ilaasha dulun  
Runta daanyi u noqdoo  
Doonaa la yidhi kalgacal

Iimaan aan dahaadh lahayn  
Dadabsi iyo dabbaal ahayn  
Danaysi iyo daba ool muraad  
Dariiqii Masiixa iyo dulkii  
Sayidka aan daba galloo  
Nafteenna u dooro daawadii

Dumarka oon dalaano iyo  
Dangalo aan la wadaajiniyo  
Xaqa oo aan duudsinaa  
Dalaaf iyo waa guul daree

Wax daran yaynaan daf odhan

Daleel u sahami naftoo  
U diid daandaansi kibir  
Dadkuna haka nabad galeen  
Dibnaha qawl ka soo bixiyo  
Addinkoo wax daara iyo  
Dayrkood ka tallaabsatiyo  
Daalaa dhaaf reero kale

Nafluhu gef ma daayo ee  
Haddii lagu daaro xumo  
Dhinac lagu dumiyo feedh  
Dulxumo yay ku qaadiinoo  
Daafac yuu galin qudhee  
U dhiib daankaaga kale  
Darbada hawceshee walaal

Dunidu waa eef yaree  
U danqada kuwa bukoo  
Bushigood ka dabiibto iyo  
Daawaynta jirooliha iyo  
Duljoogsiga salaanta iyo  
Ducadood aamiin tidhaa  
Yaa deeqda naflaha cadiban

Daran iyo Eebbaa leh deeq  
Dadkuna waa galinba cayn  
Mar baa lagu doojiyaa  
Marna lagu daba marshaa  
Hadday kuu da'do daruur  
Laguu dumo maal dabeed  
Bakhayl dayriya ha noqon

Dibjirkood quudiso iyo  
Dagaaga ood arad tirtiyo  
Agoonta ood u diir naxdiyo  
Daryeelka waayeel dayacan  
Ayuu daa'imkaa ku faray  
Adna lagugu doojin jeer

Waa duul insigu qaaliyee  
Waligaa ha dayicin naflaha  
Kuwa lagu duugay jeel  
Loo diiday xoriyaddii  
Dan iyo aan lahayn muraad  
Wixii loo dawaro kolkaa  
Iyo salaantuba waw danee  
Ha dayn booqashada dabeed  
Doorkaaga ha gabin bulshada

Ardaalkaan qab la doobyinee  
Dallicin isla weyni doqon  
Dagalka uu ku noolyihiyo  
Beesha ay dan wadaag yihiin  
Dabac iyo adeeggeeda duman  
Daabad lagu reeyo iyo  
Walaal door roone jira  
Dirac loo baxsado iyo  
Ikhwaan dalandalka jecel  
Reeruhu ay ku diirsadaan  
Masiixu kaasuu dooray oo  
Darajo iyo jannadiiba degi

Rabbiyow adigaa leh dahar  
Adaan duug noqonin waa  
Daal adigaan xiiq lahayn  
Adaan waligaa doorsoominoo

Waxaad doraad samaysay iyo  
Naxariistaadu ay durduri  
Aadaa daanyi noo noqdo  
Dhiiggii aad noo daadisaa  
Dambigii naga maydhay oo  
Baraar kaan dubi jiriyo  
Waaq dhaacin waad doorisoo  
Samihii soo dabbaashay oo  
Daliil waxaa noogu filan  
Ruuxaaga aad soo dirtiyo  
Nimcada aan durduuraniyo  
Xaqii oo daahir noqdiyo  
Rajada aan ku daaqsaniyo  
Kalgacal diirano ka yimid  
Docdaa aad naga jirtiyo  
Dushaada iyo samirka badan

Dannigu waa male ducfiye  
Waxaan darab kugu sugnaa  
Inaad soo degato oo  
Intaad adigu dooratiyo  
Dadkaaga aad qaaddo oo  
Halkaad noo diyaarisiyo  
Jannadii aan dakayno abid  
Ducadaa waa la aqbalee  
Ku dara aamiin dabeed  
Rabbiga damaashaad ku suga

## 2. MAAMUUS

Waa saar uu tiriyay M.G. Agoosto, 2002

Mutux iyo maatux iyo  
Mindiyo laysku taago iyo  
Mixnad aan dhammaanin iyo  
Muran iyo been maldahan  
Mastuur xaal laga dhigiyo  
Murugo xaajo keenta iyo  
Male la awaalo nacay  
Middii kale waxaan lahaa

Musuq iyo maasuq iyo  
Mardabo iyo tuugo iyo  
Maalkoo layska boobo iyo  
Meesi qof kaleeto oo  
La yidhi xoog baa mulkiyi  
Ninkii muruqlaa u hadhi  
Anigu mooro-duugga nacay  
Middii kale waxaan lahaa

Magac iyo muunad iyo  
Murjin la waraaryo iyo  
Maqaawiir baannu nihiyo  
Mufti daadiyaan ahiyo  
Meeqaan baan leeyihiyo  
Waxaa i dhalay maalg iyo  
Faan macno daranba nacay  
Middii kale waxaan lahaa

Maluuggii horeeto iyo  
Maxmilkii dhagaxa iyo  
Iimaan mandaq gaaban iyo

Masalo macnaheeda iyo  
Muggeeduba yar yihiyo  
Maxlal iyo madiido iyo  
Maroorkii waan nacaye  
Middii kale waxaan lahaa

Masuug iyo miijin iyo  
Macruufkoo la diido iyo  
Xaqoo laga maarsadiyo  
Maatadoon la gargaariniyo  
Miskiin lagu maadsadiyo  
Madhaxsi kuu gaara iyo  
Mitan kan cadaawe nacay  
Middii kale waxaan lahaa

Makal iyo masaarid iyo  
Madax la wareemo iyo  
Majal naf la gooyo iyo  
Mawdkoo loo adeego iyo  
Gacalkoo la maago iyo  
Mayal waran taagan iyo  
Colaadda muskaaga nacay  
Middii kale waxaan lahaa

Macduur iyo macsida iyo  
Dhawr min baan leeyihiyo  
Marwada weyn ee horiyo  
Minyaraan guursadayda iyo  
Mid baa la dumaalaydiyo  
Habeen meel dhaxa kaliyo  
Maraaci dumar baaban nacay  
Middii kale waxaan lahaa

Maag iyo kala maagashiyo



Midowgoo la diido iyo  
Waxaad tahay madiidin iyo  
Maqiiq reer hebela iyo  
Maxaa ani iigu jira  
Annagaa moolkii fadhina  
Anigu madarkaaba nacay  
Middii kale waxaan lahaa

Magaan iyo madadar iyo  
Intaan maankood wax garan  
Wadaad masalo gaaban iyo  
Maduul aan maskax lahayn  
Mayeedhaan aan la odhan  
Muranna kaa badiya iyo  
Malcuun iyo jaahil nacay  
Middii kale waxaan lahaa

Mariiq iyo meere iyo  
Madhan ama dameero jog  
Majinkii naafaha ku jiray  
Meecaadkii horeeto iyo  
Midkii degmo cirir ahaa  
Mareeg libcas iyo faruur  
Falag maarihiis waan nacay  
Middii kale waxaan lahaa

Masiix iyo Eebbe magan  
Injiilkaa mudan samiyo  
Macbudkoo la aado iyo  
Mahad badan oon naqniyo  
Muxubbo weyn iyo kalgacal  
In lagu maamuuso sharaf  
Ciddii maya tidhina nacay  
Middii kale waxaan lahaa

Murtad kuwa nagu yidhiye  
Ma aha yidhi macatabkii  
Midnimada Eebbe diidayee  
Magaca sayidkeenna iyo  
Marinkii runta ee mudnaa  
Iftiinkaa muuqana hayiyo  
Diiday ma huraanka nacay  
Middii kale waxaan lahaa

Misaal ama cid masayn  
Muunada aadanuhu yihiyo  
Malag aan la arkaynin iyo  
Wax muuqdoo idilba iyo  
Wax nool ama mootamaba  
Masiix meeqaankii la waa  
Qofkii ka masayray nacay  
Middii kale waxaan lahaa

Murti iyo milladba iyo  
Hadal macno weynle iyo  
Taariikh ma hadhaan ahiyo  
Mucjiso lala yaabo iyo  
Xigmat loo mohanahayio  
Fariin meel dheer tagtiyo  
Injiilkaa leh miyirkaa  
Middii kale waxaan lahaa

Murugo maaro loo heliyo  
Wixii aan mutaysanniyo  
Mujrimkoo la cafiyiyo  
Miryaadkii xanuunka iyo  
Dambigii oo la maydhay iyo  
Mar kale oon dhalanay iyo

Masiixaa leh maadin taa  
Middii kale waxaan lahaa

Maqsuud iyo muuso iyo  
Jacayl aan madhanin iyo  
Cishqi aan lahayn marxalad  
Mug-weyn iyo deeqsiyoo  
Intii soo mudata iyo  
Naflaha aan kala madhayn  
Masiixaa leh meel la tago  
Middii kale waxaan lahaa

### 3. DARDAARAN

Waa masaafu uu tiriyay M.G.  
ciiddii Iisterka, 2002.

Dambays hawshuu u yimid  
Gabbalku goortuu dumaye  
Cashadaii dardaaranka iyo  
Ahayd daba yaaqadii  
Markii la diyaariyayae  
Xertii miiska ay degeen  
Gacmaha xeedhadii dareen  
Kibis kolkaa diiranayd  
Khamiirna laguba darin  
Dacalka ma uusan qaban  
Dabadeedna ma uusan jabin  
“Jidhkaygii oo dartiin  
Loo dilay weeyee darbada”  
Ma daba dhigin erayadaas  
Iyana daanka ma aysan galin

Koobkiina soo ma dallicin  
Ducu goortuu ku daray  
“Waa damkii aan lahaa  
Loo daadshay aawadiin  
Dibnaha saaroo kabada  
Dariiq kaygaana mara  
Dawo ha idiin noqdiyo  
Xusuus aad dugaashataan  
Dartayna sidaas u fala”

Halkii damaashaadka iyo  
Ciidda dulmariddu ahayd  
Daaskaa kolkii laga fulaye  
Dushii Getsaman la degay

Cidlada soo ma dooranoo  
Dacal uma uusan bixin  
Duco iyo daakir soo  
Dhiiggiisii ma da'ayninoo  
Hurdadii ma uu diidinoo  
Intuu doorsoomay dhaax  
Daduu Eebbe soo diroo  
Daruuraha ka soo degiyo  
Muuse lama doodahayn

Xertiisoo dagan ahayd  
Gama soo ugama digin  
Wakhtigu kuma daba mare  
Qorshuu Eebbe sii degoo  
Miduu Sayidku doortayoo  
Ducfiyo dabadhilif noqdayo  
Horaanba uu ka sii digayoo  
Dirham iyo naar dalboo  
Waxay doonayeen Yuhuud  
Ku daaleen inay dagaan  
Dariiqay rabeen sahloo  
Dabin iyo shirqool degoo  
Ciidankii Roomana dalbaday  
Daankoo uu ka dhunkadayna  
Dabuub gacangalin ka dhigay

Askartii soo may dafinoo  
Ma dulgayn Saanxedriin  
Siduu ku bixiyaya digniin  
Butros kuu doorka biday  
Intii uusan diiqu ciyin  
Saddex goor muu dafirin  
Yehudaas soo isma daldalin  
Dugaaguna soo ma cunin  
Daartuu Bilatoos fadhiyay

Duqaas ma horgayninoo  
Maxaa dulmiyoo uu falay  
Oo ninkan lagu dacweynayaa  
Iyagii dib ma su'aalinoo  
Sidii uu dambiile yahay  
Ama uu dakaneba qabo  
Noo daa Barnabaaska xidhan  
Oo dila Ciise ma odhan  
Saliibka in lagu daldalo  
Ma noqon taladii dabeed

Daal iyo daaqo iyo  
Dubayn wixii gaadhay iyo  
Itaalkii soo ma uu darayn  
Mid dooloo la yidhaa Simon  
Oo duul kama aysan xigin  
Laba dambi soo faloo  
Ma noqon sidii daalinkoo  
Digasho aanuu mudnayn  
Diriiskuu xidhani jiraa  
Dur iyo loo daabacantamoo  
Boqorka daawadaa la yidhi  
Dubkaa waran laga gashoo  
Dushaa loo saaray qodax

Qoraxdii nuurkaa ka damay  
Gudcur baa duhurna yimid  
kii halkaa joogayoo  
Inuu daawado u yimid  
Qorigii soo laguma dirqiyin  
Dushana looma saarin dogob  
Duleedkii magaalada iyo  
Dulkii loo yiqiin lafaha  
Inuu durba geeyo oo  
Intaan maalintu dumine

Sabtidu soo daf odhan  
Degdeg loo dabo Rabbiga  
Gondaha soo lagama durin  
Geedkii laguma daabin oo  
Dushaa sare looma dhigin  
Docaha Markay naftu daysay baa  
Dunidii waxaa helay gariir  
Buurihii oo dildilaaca iyo  
Daahii macbudkoo badhaha  
Iniba daan aadday iyo  
Qabuurihii hore loo dadoo  
Daboolkii ka qaadmey iyo  
Duul reer aakhiraad aho  
Dib u soo noolaaday oo  
Dadkii wacdiyina la arag

Mid dariiqadii raacday aho  
Dahsoonaa oon laba aqoon  
Dadkuna uu Yuusuf yidhaa  
Bilatos soo kama dalbinoo  
Maydkaan duugi ma odhan  
Xariir soo kuma duubino  
Dahar cusub muusan dhigin  
Dushaa in laga ilaaliyana  
Yuhuudii ciidan ma dirin

Saddex ayaantii dabeed  
Maryan diracdi reer Magdalen  
Dumaray horseed u tahay  
Dulkii uu yaallay iyo  
Rabbigii daya maysan odhan  
Malag holacii dab iyo  
Nuurkiisu qoraxdii ka daray  
Dudadii godku uu ahaa

Dhagaxii muu dul joogsanoo  
“Sayidkii idin daba maryoo  
geeridii wuu diidayee  
maxaad dadka mootan iyo  
qabriga daya u leedihiin  
ordoo xertiisii u diga  
dulkaa iyo Galiile taga”  
hadal diiran sooma odhan

Danni lagama waayo dade  
Godkii dalaq maysan odhan  
Xariirtii lagu duubay iyo  
Kafantoo dhagax dul taal  
Dhaayahooda kuma daalacano  
Durduro dib umaysan noqon  
Dariiqaa intay sii socdeen  
Iyagoo dawakhsan oo cabsani  
Haddana farxad daanshooni soo  
Dawgii ay marahayeen  
Si aan dubaaqoodu filan  
Durba sayidkii ma arag  
Cagihiiisa kuma daadan oo  
Ma caabudin daa’imkood

Fariin soo ma uusan dirin  
Intaad daysaan baqaha  
Dalkii xawaaridu jirtiyo  
Duudkii Galiile ku yaal  
Risaalo ay ku diirsadaan  
Degdeg u gaadhsiiya oo  
Docdoodaa inaan ahiyo  
Inaan soo dayi dhawaan

Degelkii sooma uu tegino



Xertii uu doortay iyo  
Intii daacadiisa iyo  
Ahayd doonyadiisa ruma  
Umuu dejin laabta oo  
Shakigii kama dulqaadin oo  
Siduu Eebbe doonay iyo  
Umuu dirin hawl dabeed

Ordoo gala dunida oo  
Usheega dadkoo dhanba oo  
Dacwada Eebbe qaada oo  
Waxaan doraato idin bariyo  
Injiilkana ku dooda oo  
Deeqsiya warkaa san oo  
Dembiga ka durkana dhahoo  
Mukhuur ay ku daahiraan  
Magaca daa'imkiina iyo  
Curadka uu doortay iyo  
Ruuxiisa uu soo diraad  
Biyaha daf ku siiya oo

Samaha ha ka daalinoo  
Ha raacina dano gaar aho  
Dardaarankaa ha ka leexanina  
Magic kayga ku diirsadoo  
Danaha aad leedihiin  
Dalboo Eebbe ku warsadoo  
Ducada iyo badiya digriga  
Anna idin dayici maayo oo  
Docdiinaan goorwalba aho  
Ruuxaan idinku soo dejino  
Idiin noqon wehel dabeed

Goortuu hadalkii daba jaraa

Iyadoo la daawanahayuu  
Samada u duulay oo  
Waxaa qariyay daruuro oo  
Carshiguu dib ugu noqdoo  
Kuriguu ku dangiigsadoo  
Boqor weeye daa'imoo  
Weligii aan duugoobin oo  
Geeridu ma dullayn kartoo  
Ibliis ma dawaafsan karoo  
Dib buu u soo laabmiyoo  
Dunidaan isagaa xukumi

#### 4. IFTIINKII BAXAAYOOW

Waa geeraar uu tiriyay M.G.  
Maarso, 2002.

Gabankii Eebbeheenee  
Daa'uud loogu abtiriyoow  
Israaiil firkiisoow  
Aarkii Yahuudoow  
Ruuxii Ilaahoow  
Eraygii Waqay ee  
Dunida loo abuurroow

Awaaloo Masiixoow  
Iftiinkii baxaayoow  
Nuurkii abaadoow  
Ilays aan damaynoo  
Cidi aasi karinoow  
Abid kii jiraayoow  
Alfa iyo omeegoow  
Aadanaha hortisaba  
Kii ahaani jirayoow  
Asalkii Waqay ee  
Innaba aan doorsson  
Laga eegahaynoow

Waligii ma iishoow  
Boqorkii ammaantee  
Haybad loo ogaayee  
Uumiyaha dhammaan  
Ifka inta joogtiyo  
Inta aadday aakhiro  
Lagu soo ag qabane  
Asaaagiisu jirinoow

Amiikii nabadoow  
Cafis kii abaadshee  
Kuwii isaga aabiyay  
Dambigoodii oofshee  
Aan lahayn asaayee  
Aarsi aan aqoonoow

Aabihii jacaykoow  
Dambigeenna awgii  
Asiiliguu lahaa iyo  
Alabkii carshiga sare  
Arinkeenna uga yimid  
Loo ajalay gefkeenoow  
Naxariis abkeedoow  
Dhibta uu arkaayiyo  
Cabashadiisa aadmiga  
Kii ahaa ijaaboow

Sayidkii adduunkoow  
Kii abuuray dunidee  
Erayguu yidhaahdaba  
U ahaani jirayee  
Amar oo dhan yeeshoow  
Unuggii nimcaadoow  
Kii anfaca bixiyee  
Kumaan arsaaqee  
Agagaarkuu joogiyo  
Gaajo ool agtiisoow

Rabbigii arwaaxdoow  
Aadan intuu dhalay  
Kay ku oogsadeenee  
Rajo eeganaynoow

Jinnigiyo ibliiskiyo  
Shaydaanka ubadkii  
Kii amarka siiyee  
Ay ka anfariireen  
Erayguu yidhaahdee  
Ka adkaa sharleydoow

Arbihii itaalkee  
Quwad loo ogaayoow  
Xoog kii abaadeen  
Marna laga adkaanee  
Qolo aabiyaynee  
Aan laga irdhoonoow

Agmadkii axkaantoow  
Xigmad aanaheedoow  
Kii loo ogaayee  
Aqli laga isriyoow  
Abwaanoow aftahankii  
Soo askumay aqoontoow  
Orta kii yaqaanee  
Halkana abuurroow  
Ilaheeda garashada  
Kaan lala ekaynoow

Sayikaan addeecnoow  
Kaan urursan maalee  
Oori aan lahaynee  
Aqal aan u hoyanee  
Arimaha adduunkiyo  
Waxayaal arladan iyo  
Aan asiibin damacee  
Ku abaaday khayrkoow

Kali ayda meeroow  
Cidla aag wareegoow  
Afartan maalin sooniyo  
Duco aawadeeniyo  
Xumaheen ka ooyoow  
Samir eheladiisoow  
Kii la aabiyaayee  
Aflagaado oo idil  
Dusha aayar saartoow  
Qurux iyo edaab iyo  
Rabbigii asluubtoow  
Axdigii heshiiskee  
Dembigii abkoowgeen  
Dhiiggiisu aasoow  
Warsan kii inshaaree  
Injiilka noogu baaqee  
Samaha noo ahaayoow

Xayi kii ahaayee  
Ka adkaaday iilkee  
Loo oofshay samadee  
Carshigiisii aadee  
Eebbeheen la joogee  
Ayaantaa qiyaamaha  
Kaan eeganaynee  
Abshir noo ahaayoow

Ma awaalo beenoo  
Asaraar ma fiicnee  
Afka lagama qaadoow  
Sayidkaan addeecnee  
Xertiisii ahaanee  
Injiilkiisa raacnee  
Eraygiisa weyn iyo

Magaciisa Eebahay  
Ku nidhaahnay aamiin  
Idilkood dadkiisiyo  
Intaa aamintee sugi  
Ruuxiisu oonkiyo  
Ha ka saaro eelaha  
Ha arkeen ayaankaa

## 5. GURMADKAAGII

Waa masaafu uu tiriyay M.G.  
Agoosto 2002.

Garaad kaagu weynaa  
Badanaa garasho taaduna  
Jacayl aan gaagixin  
Nimcadaada guud iyo  
Raxmaddaada gaarka ah  
Gargaarkaaga aan cidi  
Marna goyni Karin iyo  
Naxariis gu' weyn iyo  
Adigaa garawsho leh

Gaban markaan ahaa iyo  
Hadduu xoog I gaamuray  
Gallad taada Eebow  
Adigaa garabkayga iyo  
Ii ahaaba gaashaan

Markii ay i guuleen  
Cadawgay i gaadeen  
Gabood laygu maagee  
Laygu helay gabraarten  
Gabayraha u rooreen  
Gacal aan u ciirsado  
Iyo waayay gaaraan  
Gallad taada Eebow  
Gurmadkaagii waan helay  
Adigaa garabkayga iyo  
Ii ahaaba gaashaan



Markii guluf i weeraray  
Layga maray goonyaha  
Nacabkay gadoodani  
Gaashaanka buureen  
Gees walboon eegaba  
Gaaska iyo guutadu  
Waran igu gadaameen  
Hubka ay u gurteen  
In la gooyo qudhaydaba  
Gallad taada Eebbow  
Gurmadkaagii waan helay  
Adigaa garabkayga iyo  
Ii ahaaba gaashaan

Markii ganaf colaadeed  
Reerkaygoo la gabawaro  
Gabagabana laga dhigo  
Tashi ay ku gaadheen  
Gurteen xoolo haygii  
Gasiin kaan lahaa iyo  
Guunyadiyo gammaankii  
Gurigii iyo gaadiidkii  
Laga dhigay gabaahir  
Goob bannaan I joojeen  
Gallad taada Eebbow  
Gurmadkaagii waan helay  
Adigaa garabkayga iyo  
Ii ahaaba gaashaan

Markii gaaridaan lahaa  
Gabanadii aan dhalay iyo  
Gabdhihiyo dhallaankii  
Indhuhu ay guduuteen  
Goroseen calool xumo

Galaa-yuusku yeedhaye  
Gabawaras inuu helo  
Ay gaadhay xaajadu  
Gallad taada Eebbow  
Gurmadkaagii waan helay  
Adigaa garaabkayga iyo  
Ii ahaaba gaashaan

Markii goluhu ii shiray  
Loo wacayna guurtiga  
Gef aanan lahayn iyo  
Ceebayn la guda galay  
Loo guntaday xumaantay  
Gees ka geesna faalladu  
Wada gaadhay uunkaba

Layga dhigay gabbaankee  
Doqon aan garaad iyo  
Lahayn garasho dheer iyo  
Gorof dawdar baasiyo  
Laygu tiriyay gaanjida  
Gallad taada Eebbow  
Gurmadkaagii waa helay  
Adigaa garabkaygiyo  
Ii ahaaba gaashaan

Markii lay gulaalee  
Gocor laygu sheegee  
Gaar la ii faquuqee  
Layga gooyay beeshee  
Sidii goroyo cawshaba  
Gooni meer ahaadee  
Lay godoonshay awgaa  
Gallad taada Eebbow

Gurmadkaagii waan helay  
Adigaa garabkayga iyo  
Ii ahaaba gaashaan

Markii xigtadaydii gacal  
Ii saartay gaaraha  
Gaadhay dayradaydiyo  
Gayr in lay bado  
Lay guhaadshay dhaaxoo  
Geeridayda loo bogo  
God sidii aan galay  
Nolol lay gunaanado  
Intii shay gadaafo ah  
Garta layga dhigayee  
Aan gumoobay awgaa  
Gallad taad eebbow  
Gurmadkaagii waan helay  
Adigaa garabkayga iyo  
Ii ahaaba gaashaan

Markii asmo lay ganay  
La ila gaaday sixirkee  
La igu gaafay belaayada  
Sharka la ila daba galay  
In la gaddiyo ruuxaygiyo  
In la gaabsho dhaayaha  
Falka layla goobaye  
Layla gaaf wareegaye  
Guntin lay xabaalaye  
Geedo jaanna lay sudhay  
Gallad taada Eebbow  
Gurmadkaagii waan helay  
Adigaa garabkaygiyo  
Ii ahaaba gaashaan

Markii reerkayga loo galay  
Gacalo taan jeclaadiyo  
La gubaabshay xaaskee  
La galay dhexdaanada  
Gurigaygu inuu dumo  
La kala geeyo qoyskana  
Gadh cas iyo gambooley  
Midiba uu geestii  
Gucle roorka badiyeen  
Gallad taada Eebboow  
Gurmadkaagii waan helay  
Adigaa garabkaygiyo  
Ii ahaaba gaashaan

Markii ubadka loo galay  
In la gambiyo firkaygiyo  
In gab nalaga dhigo  
Gablan la ila doonaye  
Waabay la soo guray  
Inta geed dhunkaaleed  
Naloo galiyay raartee  
Gasiinkaan cunayniyo  
Intii weel guriga taal  
Lagu gaaray saxamada  
Inay badato geeridu  
Go'aan sabiga oo dhami  
Adigaa ka guda yidhi  
Gallad taada Eebbow  
Gurmadkaagii waan helay  
Adigaa garabkayga iyo  
Ii ahaaba gaashaan

Markii ganacsigaygii iyo

Hawshayda gaarka ah  
Layga galiyay farahee  
Lagu sheegay guracee  
Xumo aanan galin iyo  
Waxaan oollin goobtaba  
La ii sudhay gorodee  
La gurayay raadkay  
Loo laabay gaafaha  
Galgalinna laga dhigay  
Gambana ha waayoo  
Ha gaajoodo reerkuyoo  
Ha guuraanna lays yidhi  
Gallad taada Eebbow  
Gurmadkaagii waan helay  
Adigaa garabkayga iyo  
Ii ahaaba gaashaan

Markii deriskii goonyuhu  
Noo yeelay gawlkee  
Gawsahana noo dhigay  
Gaadhi waayay ubadkuna  
Goobtii waxbarashada  
Loo istaagay gaasaha  
Kuray maro gaduudani  
Aflagaado iyo gacankaad  
Gaalada laaya uu yidhi  
Waalidkiina garab galay  
Gabrid noqotay meeshii  
Gallad taada Eebboow  
Gurmadkaagii waan helay  
Adigaa garabkayga iyo  
Ii ahaaba gaashaan

Markuu gooddigii iyo  
Batay gaara gaarays

Nala galiyay geeskee  
Geyigaan ku noolayn  
Beeshaan gacal ahayn iyo  
Intii biri-ma-geydada  
Nalaga yeelay goonida  
Haddaan gaadhno meeloo  
Dano gaara aadnana  
Gacan fiiqa baaqiyo  
Gafi mayno aabiga  
Mid gidaarka yuurura  
Oo gabay dantiisiyo  
Areebo gawso weyn iyo  
Jaahil soo galootiya  
Gallad taada Eebboow  
Gurmadkaagii waan helay  
Adigaa garabkayga iyo  
Ii ahaaba gaashaan

Afka laguma gaadhoo  
Goob haddaan idhaahdana  
Soo goyni maayee

Markii xaajo gobo'diyo  
Gasho meel cidhiidhiya  
Gargaarkaygu waa adi  
Gacantaada weyn baa  
Goonya hayga jooqtoo  
Ka helaa garbaynoo  
Galin maayo laabtana  
In layga guul heli  
Gallad taada Eebboow  
Gurmadkaagii waan helay  
Adigaa garabkayga iyo  
Ii ahaaba gaashaan

## 6. XEROW XUSUUS MUDAN

Xuskiisa inkastoo aan lagu soo koobi karin bogag yar, haddana toddobadan cutub ee geeraarka ah, waxaan xusuus uga dhigay walaalkeena naga qarsoomay, Axmed Cali Xayle, oo qiime iyo qaaye aad u wayn ku dhex lahaa guud ahaan dadka Soomaalida, gaar ahaanna kaniisadda Ciise Masiix, oo uu waxbadan hormuud ka ahaa. Waxaan curiyay geeraarkan 3dii Meey, 2011, maalmo yar kadib geeridii marxuumka.

Xigaalkii nabaddee  
Xiisaddiisa samihyo  
Xal uhelid masiibada  
Xarafkeeda dhigayee  
Xarbigaa colaadaha  
Xaladhaleyda raadshee  
Xumahoo la diidiyo  
Xurguf ka dhawrsiga  
Xaal in loo mastuuriyo  
Xaajogal ahaayoow  
Xayow Axmed Xayloow  
Xerowgii Eebbihiisee  
Xulashada walaalaha  
Xilbax loo nisbeeyee  
Xurmo nagu lahaayee  
Xusuusteenna mudanow

Xulafadiisa Eebbahay  
Xiise kii u badiyee  
Xajinaayay qirashada  
Xarafkii Waqiisee  
Xubbigiis ahaayeen  
Xadhiggiisa gooynee

Xarakada Masiixiyo  
Xamdigiisa badiyee  
U xadreeyay dhaaxee  
Xubin wayn ka qaatoow  
Xayow Axmed Xayloow  
Xerowgii Eebbihiisee  
Xulashada walaalaha  
Xilbax loo nisbeeyee  
Xurmo nagu lahaayee  
Xusuusteenna mudanow

Xaasaan miskiiniyo  
Xafaare taag daran  
Xanfaf nimuu helay  
Xantiire qoys galay  
Isagoon u kala xilan  
Xurquunkii daruuriga  
Xandho kolay tahay  
Xagagab wuxuu helo  
Kii u xaasinaayee  
Xasanaadka falayoow  
Xayow Axmed Xayloow  
Xerowgii Eebbihiisee  
Xulashada walaalaha  
Xilbax loo nisbeeyee  
Xurmo nagu lahaayee  
Xusuusteenna mudanow

Xigtada kuwuu baday  
Xalli yidhi amuurtood  
Xinif iyaguna qabay  
Xubintii laxaadkiyo  
Kaa xuubshay xooggii  
Lama aad xintaminee



Xeerkii Injiilka iyo  
Suu xaakimkeen qiray  
Xabad kii ka saaree  
Xugmay caafintoodow  
Xayow Axmed Xayloow  
Xerowgii Eebbihiisee  
Xulashada walaalaha  
Xilbax loo nisbeeyee  
Xurmo nagu lahaayee  
Xusuusteenna mudanow

Xaruntiisa reerkiyo  
Hadba xerada uu dego  
Kii loo xoomi jirayee  
Xirgida cuqaashiyo  
Xaajoodka sheekhyada  
Xigmadoo la qaybsado  
Xifaalaynta guudiyo  
Xogwaranka mooyee  
Iyadoon xanaaq jirin  
Doodda xalin jirayow  
Xayow Axmed Xayloow  
Xerowgii Eebbihiisee  
Xulashada walaalaha  
Xilbax loo nisbeeyee  
Xurmo nagu lahaayee  
Xusuusteenna mudanow

Xile Maarta Xayliyo  
Xayi Afraxii curad  
Xubbidaa Safiya iyo  
Xuur Geeddi yarihii  
Qoyskaad xannaaniyo  
Xoojinaysay kaalmada

Rabbigaa xawilayee  
Xuska adiga mooyee  
Xagal daaci maayaan  
Ka xijaaban baalluhu  
Xayow Axmed Xayloow  
Xerowgii Eebbihiisee  
Xulashada walaalaha  
Xilbax loo nisbeeyee  
Xurmo nagu lahaayee  
Xusuusteenna mudanow

Xaggii loo badnaa iyo  
Xudinteeda aakhiro  
Xukunkiisa Eebbaha  
Xalaal baad ahaydoo  
Xisbigii Masiix iyo  
Xaqii aad rumaysaa  
Xisaabtaada qaadayo  
Ku xarootay jannadee  
Xugmadiisa Rabbigaan  
Xallad naawilaynaa  
Xayow Axmed Xayloow  
Xerowgii Eebbihiisee  
Xulashada walaalaha  
Xilbax loo nisbeeyee  
Xurmo nagu lahaayee  
Xusuusteenna mudanow

## **7. GAALLIN INAY TAHAY AL SHABAAB**

**Masaafada Baroordiiqda ah ee aan xusuusta uga dhigay Masiixiyiintii Soomaaliyeed ee ay gumaadday Al Shabaab, oo uu ka mid ahaa marxuum Mansuur Maxamed, waxaan curiyay 21kii Febraayo, 2009kii.**

- 1. Geeridu waa lama huree,  
gadaafaha kalaa ka daran  
Waxaan gayigeenna horay,  
Iyo gadaalba loo arkayn  
Gadaf iyo xurmadii xaqay,  
gabood dhigeen gawaan  
Dad miyaa la gooriyaa,  
sidii xoolaha la gawracaa?  
Madaxii laga gooyay iyo,  
goroda gaalliso loo sudhaa  
Gaallin inay tahay Shabaab,  
gob aysan marnaba ahayn  
Falaadkoodaa laga gartaa,  
gaboodahay bulshada ka gali  
Gabadh aan wax gaysan iyo  
raggay xaqdarada god-dhabi**
- 2. Maatada miyaa loo ganaa,  
nabsi miyaa laga gurtaa  
Godob aan abidkeed hadhayn,  
gacalka miyaa laga galaa  
Xaqa miyaa laga gudaa,  
anaa manta kaa golweyn  
Miyaa la isugu goodiyaa,  
ruuxaan guluf kugula jirin**

Miskiin ku gabani gacmaha,  
miyaa loo gaystaa guhaad  
Gaallin inay tahay Shabaab,  
gob aysan marnaba ahayn  
Falaadkoodaa laga gartaa,  
gaboodahay bulshada ka gali  
Gabadh aan wax gaysan iyo  
raggay xaqdarada god-dhabi

3. Gayigay Soomaalidu lahayd,  
kuwan baday guul-darada  
Garacda yaa dhalay Shabaab,  
xaggay naga soo galeen  
Galgaal iyo gollidan baas,  
golxob iyo gudmaha watee  
Ku gawriir saday dalkii,  
ka dhigay beelihii galgalin  
Guraca iyo gumaadka wada,  
ciday ka garqaadan jirin  
Gaallin inay tahay Shabaab,  
gob aysan marnaba ahayn  
Falaadkoodaa laga gartaa,  
gaboodahay bulshada ka gali  
Gabadh aan wax gaysan iyo  
raggay xaqdarada god-dhabi

4. Mansuur raga madaxa guray,  
Waldiire gumaca ku gubay  
Ku garaacay Daauud rasaas,  
gablan ka dhigay geesiyaal  
U gartay gabanno agoon,  
haween gaariyadii u dhaxay  
Inay ciil la gawriirsadaan,

gasariir aan garaw lahay  
Gabxo waxay qoys dhigeen,  
ama gabawar reero badeen  
Gaallin inay tahay Shabaab,  
gob aysan marnaba ahayn  
Falaadkoodaa laga gartaa,  
gaboodahay bulshada ka gali  
Gabadh aan wax gaysan iyo  
raggay xaqdarada god-dhabi

5. Kuwaas gaaridana ku dilay  
Intay gulaammo kufsadeen  
Gabantu way galmootay yidhi,  
god dheer u geeyay garbaha  
Goonyaha kala maray dhadhaab,  
kaga gooyay naftana halgaad  
Garsoor hadduu jiro cadliya,  
kuwii la yidhi u gude  
Maxaan goobta looga helin,  
gartaa waa in dib loo naqaa  
Gaallin inay tahay Shabaab,  
gob aysan marnaba ahayn  
Falaadkoodaa laga gartaa,  
gaboodahay bulshada ka gali  
Gabadh aan wax gaysan iyo  
raggay xaqdarada god-dhabi

6. Iyagoo goodigooda faan,  
garmaamaha dhulkii gadiyay  
Ganbiga markii la galay,  
guutadu ka timid galbeed  
Xamar goonyaheeda la degay,  
Shabaab soo kuwii gabaday

**Qoryaha muska ay gasheen,  
iyagoo luli laba gacmood  
Intay dumarka dhex galeen,  
kuwii guryaha isku xidhay  
Gaallin inay tahay Shabaab,  
gob aysan marnaba ahayn  
Falaadkoodaa laga gartaa,  
gaboodahay bulshada ka gali  
Gabadh aan wax gaysan iyo  
raggay xaqdarada god-dhabi**

- 7. Raggi ganbay xidhan yihiin,  
waxay soo gashani khamiis  
Gadhkii oon la xiiri karin,  
waa inay shaarubada guraan  
Surwaalkuna u gaaban yahay,  
teendhay dumarkii u galin  
Sidii aqal guura hayay,  
la ekaan labadaa gidaar  
Wajiga waa inay gedfaan,  
sidii aan cidiba u garan  
Gaallin inay tahay Shabaab,  
gob aysan marnaba ahayn  
Falaadkoodaa laga gartaa,  
gaboodahay bulshada ka gali  
Gabadh aan wax gaysan iyo  
raggay xaqdarada god-dhabi**

- 8. Ma laha guurti sugan,  
dhammaan waa godadlayaal  
Waa niman garroomid badan,  
gudoodi naagaha u guda  
Goobaare haddana gaadaa,**

**gabbaray dadkii ka guri  
Gasiinna wax uma gadaan,  
intaa waxay raadin garab  
Hunguri way la gaylamaan,  
gadaalna wax uma dhigtaan  
Gaallin inay tahay Shabaab,  
gob aysan marnaba ahayn  
Falaadkoodaa laga gartaa,  
gaboodahay bulshada ka gali  
Gabadh aan wax gaysan iyo  
raggay xaqdarada god-dhabi**

- 9. Ciil baa aniga i gubi,  
cadhaan la gadoodi dhaax  
Inaan goosto aar sidii,  
markii laabta aan gashana  
Xeer baa ii cesha gadaal,  
eraygii sayidkaan gocdaa  
Wuxuu guuluhu na faray,  
haddii lagaa galo xumaan  
In aadan gaafaysi galin,  
gacanta ay gartaadu noqon  
Gaallin inay tahay shabaab,  
Gob aysan marnaba ahayn  
Falaadkoodaa laga gartaa,  
gaboodahay bulshada ka gali  
Gabadh aan wax gaysan iyo  
raggay xaqdarada god-dhabi**

- 10. Galin ma seexdo habeen,  
gama'na ma lado hurdada  
Gabood nimanka wax falay,  
gulufka ay nagu wadaan**

**Geeddanka aan wax tarin,  
gunburi weeye ee galgalin  
Gaddeedii anoon ku celin,  
garwaan kii ay galeen  
Gibilka loo sudhin gartaa,  
gabalku ugu dhicin gawriir  
Gaallin inay tahay Shabaab,  
gob aysan marnaba ahayn  
Falaadkoodaa laga gartaa,  
gaboodahay bulshada ka gali  
Gabadh aan wax gaysan iyo  
raggay xaqdarada god-dhabi**